



吳門補乘八九



內閣文庫		
元	九	漢
函	〇九	書
七八	八	
架	冊	號
額		

內閣文庫		
番號	漢	9098
冊數		8 (7)
函號		392 19



吳門補乘卷八

吳縣錢思元宗上輯

吳縣錢思元宗上輯

雜記補

錢草文庫



晉簡文帝咸安二年徙海西公葬于吳縣見縣志災異 敕吳國內史刁彝

防衛又遣御史顧允監察之十一月妖賊盧悚遣弟子許龍晨到

其門稱太后密詔奉迎興復帝初欲從之納保母諫而止龍曰大

事將捷安用兒女子言乎帝曰太后有詔便應官屬來何獨使汝

也汝必為亂因叱左右縛之龍懼而走帝知天命不可再深慮橫

禍乃杜塞聰明終日酣暢耽于內寵有子不育庶保天年時人憐

之為作歌焉朝廷以帝安於屈辱不復為虞太元十一年十月甲

申薨於吳音青海西公紀

唐蘇州吳縣毗汪鳳宅在通津往往怪異起焉不十數年鳳之妻子洎僕使輩死喪畧盡鳳居不安因貨之同邑盛忠忠居未五六歲其親戚凋隕又復無幾忠大憂懼則損其價而標貨焉吳人皆知其故久不能售邑胥張勵者家富于財羣從強大爲邑中之蠹橫與忠同里每旦詣曹路經其門遙見二青氣粗如箭斨而緊銳徹天勵謂寶玉之藏在下而精氣上騰也不以告人日日視之因詣忠請以百緡而交關焉尋徙入復晨望其氣不衰于是大具畚鍤發其氣之所萌掘地不六七尺遇磐石焉去其石則有石櫃雕鏤製造工巧極精仍以鐵索周而束縛皆用鍊汁固縫重以石灰密

封之每面各有朱記七窠文若籀篆而又屈曲勾連不可知識勵卽加鉗鎚極力開拆石匱旣啓有銅釜可容一斛釜口銅盤覆焉用鉛錫錮護仍以紫印九窠迴旋印之而印文不類前體全如古篆人無解者勵拆去銅盤而釜口以緋繪三重冪之勵纔揚起忽有大猴跳而出衆各驚散無敢近者久之超越莫知所詣勵因視釜中乃有石銘云禎明元年七月十五日茅山道士鮑知遠囚猴神於此其有發者後十二年胡兵大擾六合煙塵而發者俄亦族滅禎明卽陳後主叔寶年號也勵以天寶二年十月發至十四年冬祿山起戎自是周年勵家滅矣集異記

蘇州節度使錢元鐸之猶子文炳開寶五年妻邱奄化訪吉兆于報

恩禪宅之側古松區中僧常泰者共疑叢薄踞岡當必昔賢墳墓
不可重營炳執不從董役發之果古墓道版石數重梓廬灰盡惟
一骸亞石間長逾丈所脛且三尺明比南金東一銅鐺旁鏤青花
西壁劍器亦且敗毀惟環在靶佳玉所成合抱芙蓉瑩然精白炳
心尤愛不聽役入因酌而下將攬其環忽一黑蜂狀如球丸從劍
下螫炳右眉間尋見悶絕輿還乃卒泰具掩之翌朝炳之丕子知
玄方伸號躄遽亦冥然見一丈夫道貌古野身度丈餘魚鱗之甲
足色如金徒跣挺劍前語玄曰我帝堯之臣繇余氏也與陶臣氏
烏陀氏佐禹理水以功封吳獲葬於茲當時此地乃海東漸之山
也宅兆■吉居之且安柰何爾父剛愎發吾版石願已非義而乃

更欲奪吾玉櫛罪孰甚焉雖今擊死然方隸吾籍吾於冥間大有
主治而父且無苦宜勿念悼知玄始甦錢希白特爲之紀以知宅
墓吉凶始諸太古而冢訟之說爲不可掩堯帝而來汔於開寶數
百千載而精爽猶在足信定分之不可逾而直諫忠忱之不泯也

羅泌
路史

宋時語曰蘇常熟天下足見陸放翁奔牛閘記蓋宋都開封仰東南
財賦而吳中又爲東南之根柢也至南渡後駐蹕臨安與蘇接壤
關係尤重今蘇爲五方雜處田畝少戶口增歲收不足恒藉川湖
之運且改爲湖廣熟天下足矣

宋末元兵攻常州劉師勇拒守月餘乃破深疑平江有備及得之曰

平江鐵城紙人常州紙城鐵人鄭所南詩序

趙從善名師彝伯驥子尚書自號無著居士家居吳郡尹天府日招郡學喬

木在家塾訓子希蒼而喬生者寔無所知乃饜養人耳不能責成

其弟子特委靡依隨而已忽教希蒼以且望祀孔聖令匠依公庠

釋菜儀制鑄追禮器等依奉常行禮同里黃子由尚書聞之欲發

譴會從善知悉令毀棄而逐喬生後希蒼倅紹興日令庖人造燥

子茄子欲書判食單問廳吏茄字吏曰草頭下著加即援筆書草

下用家字乃蒙字郡人目曰燥子蒙會稽郡治有賢牧堂謂范文

正公趙清獻公翟忠惠公朱忠靖公趙忠簡公史越王張毘陵守

像民祠之從善嘗帥浙東日使門吏諭耆宿經倉憲兩司陳乞以

州治賢牧堂增從善像兩司一時奉承從請既成有郡士朱萬年

題詩於堂日師曩使眾作祠堂要學朱張與翟王大家飛上梧桐

樹自有旁人說短長張仲文白頽髓

紹興三年八月浙右地震地生白毛韌不可斷時平江童謠日地上

白毛生老少一齊行其後行成賦役無寧歲天下勞擾百姓疾怨

焉往年軍多虜掠婦人有母子並隨軍而行謂之老少軍時韓劉

諸公往來更成老少之行不下數十萬人也地震見志

自中原遭兀朮之變人死於兵革水火疾饑墜壓寒暑力役者蓋不

可勝計而避雨廣者幸獲安居連年瘴癘至滅門如平江府洞庭

東西兩山在太湖中非舟楫不可到胡騎寇兵皆莫能至然地方

共幾百里多種桑麻柑橘餬口之物盡仰商販紹興二年冬忽大寒湖水遂冰米船不到山中小民多餓死富家遣人負戴蹈冰而行遠又冰拆陷而沒者亦衆泛舟而往率遇巨風激水舟皆積冰重而覆溺復不能免

二條莊綽
雞肋編

紹興甲寅七月十四日吳縣光福雅宜山一村夫以事私恨其母遂萌梟獍之心懷刃挈榼與母同之近村看親中路藉草飲意欲乘醉行逆時天晴霽俄有黑雲驟然大震一聲擊其子殞道旁母初不知而怪其衣中懷刃有知其謀者始以告焉又長洲縣北原村農夫謝三不敬其母動有悖言乾道庚寅五月雨霽欲放田水豈母而出纔至田所大雷震死

郭象睽
車志

王德全少卿珏紹興十四年待行在糧料院闕寓居平江橫金市市

之西南曰魯都灣

卽吳縣志
魯多涇

有田數百畝欲卜築於彼未果也相

去又半里爲寶華山有禪刹曰慈嚴智顯殿宇宏敞近村寺舍皆莫及土人呼爲靈隱主僧來謁王言昨夜夢神人告云橫金王判院乃舊檀越興茲一方有善緣盍勉之使居此地其意殊不可曉于是王決策謀徙而未能遽辦會其妹婿李杼通判以所居求售卽買之而拆致其材植以供用甫兩歲第宅落成他日同嫻朋詣彼刹登鐘樓讀其鐫誌曰重和元年將仕郎前崑山縣主簿王珏施淨財一萬鑄造正與己姓名同主僧相顧歎異始悟神人有緣

之語

夷堅
志

重和戊戌歲

錄按重和宋徽宗年號止一年無戊戌當作丁酉是年應安道守蘇正與下文相合

平江盤門外

太和宮相近耕夫數人穴一冢初入隧道甚深其中極寬如夏屋然復有數門扇鑰不可開耕者得古器物及雁足鐙之類以為銅也欲貨之熟視乃金因紛爭至官時應安道逢原為郡守盡令追索原物到官乃遣郡官數人往閉其穴觀者如堵其中四壁皆繪畫嬪御之屬丹青如新畫手殊奇妙有一秘色香鑪其中灰炭尙存諸卒爭取破之冢之頂皆畫天文元象此特初入之室未見棺柩意其在重室內也又得數器而出乃掩之後考圖經云吳孫破虜堅之墓也然考之吳志堅薨葬曲阿未詳此果何人也

墨莊漫錄

寶慶

宋理宗年號

丁亥七月十一夜四更大風起西南雨如注屋瓦皆飛

一時頃風從東北四射天地震搖平地水長數尺百年之木發拔無遺民居不以高下毀八九死於水中者不可勝計厓澣尸如積是歲既無年餓死者益多明年春大疫比屋相枕藉嘉興平江安吉三郡尤甚被其毒者戶減十五六烹魚者率從腹中得人指髮羣從往平江買鯉于市剖之得人耳猶懸珠璫富人子見流民餓婦粗白皙者持粟數斗畀其夫而納之食以粥兩日而後能視夜見天神叱之曰此婦當殍死爾何強食之不速遣當貽汝家禍富子不忍翼日神復見怒曰弗去將併疫爾家俄而婦病亟昇之出門即死

鬼董

按丁亥為寶慶三年志但紀風災明年為紹定元年志大疫失載

近歲平江虎邱有虎十餘踞之同里葉氏墓舍在焉其一大享堂虎

專為食息之地凡人獸之骨交藉于地蛇骨亦有之虎之飢則果實皆啖不特獸也其堂下大泥滓虎飽則輾轉于中旁居之人熟窺之凡食男子必自臂起婦人必自乳起獨不食婦人之陰或有遇之者當作勢與之敵而旋退引至曲路即可避去蓋虎不行曲路故也

癸辛雜識別集

城南梁興甫者身幹短而膂力絕人永樂間嘗往南京偶止某門見守門軍晝掠人物心甚不平因以好言論之軍怒撲興甫興甫連踣數軍軍以達于指揮逮興甫至置高手者十人于堂上堂下列勇士百人與甫見指揮長揖不拜言辭慷慨指揮心頗異之曰聞汝之伎願一觀之興甫即結束下堂拳所至衆皆斂避莫敢措手

以是徑出其門郡城有衆惡少日聚賭必勝人乃已興甫聞之攜一篋斗置錢數千以往惡少方博樓上興甫至與博佯敗後乃大勝曰我欲歸不博矣惡少將詬侮之興甫以樓中不可用手盡取錢實斗中幾滿以其肘挾斗唇下樓若空斗然惡少大駭不敢肆侮詢之人知其為興甫也他日至北京有一勇士與陳蠻子者素號多力兩人方撲興甫旁觀竊笑之撲已勇士取興甫于手中云汝欲東耶西耶興甫曰第隨所之言已興甫立于地而勇士跌矣陳蠻子怒徑前扼其胸于墻墻為之動興甫躍起陳肩陳不覺仆地良久而起與勇士皆再拜願為弟子興甫挾其能游四方竟無敵手廣西僧有號勒菩薩者以拳手高天下遊食至吳時興甫已

老約與北寺相見與甫往僧已先在北寺殿前有施食臺其高幾丈濶倍之二人登臺相撲觀者如堵與甫一拳中僧右目睛突出于面僧以手去之分必死奮力相角擊與甫墮臺被與甫以足跟傷其胸與甫歸內傷二日死僧亦三日死

戴俊者蘇州將家子少師事梁與甫嘗與一陝西人同往四川經一山庵中有老僧善撲揭字于門二人入僧有兩童子守門亦善撲遂與對手童子不能勝乃驚入報老僧者坐禪床上曰汝二人能勝我童子亦高手也因命其一人前老僧坐恒不動惟畧舉手而其人已擲于地及俊至僧仍擲之俊立不仆僧異之曰汝可教也因畱止盡以其術授之蓋僧居山中見老猿二日相角為戲其技

甚神非世人可及後一猿中箭死僧閒暇時與孤猿戲撲因得其妙俊既得僧傳思天下惟僧為愈已乘其不意殺之出山由是俊之伎益神矣南京人有尤十六者力舉千斤素無賴出行常要人索飲有不識者即以手起廊柱置人衣裾其下人許酒乃脫俊間入南京知之一日同集教坊觀雜劇俊故踐尤一足尤大怒將拳之俊佯怯出尤勝下而尤仆地被俊數十跟子乃呼謂曰尤十六汝不識戴二官人耶尤拜謝乃免觀者千人稱快尤後肆不逞時仁廟監國命官軍捕之弗克俊復擒以獻決脊四十嘔血死太宗在北平聞之甚惜

二條
談纂

京師有蒯侍郎術蒯為吳香山人斲工也永樂間召建大內凡殿

閣樓榭以至迴廊曲宇隨手畫之無不中上意者位至工部侍郎子孫猶世其業弘治間有仕為太僕少卿者今江南木工巧工皆出於香山近七陵九廟等功成工匠為卿者多矣而工曹亦被濫

恩時謂工官轉遷何異斜封墨勅

皇明紀畧

香山吳璠村有蒯侍郎墳石碣僅存已成沒字碑應即前明加銜侍郎蒯祥蒯福父子今山中上蒯下蒯二村蒯姓尚多或其後裔惜無宗譜可考矣

里豪市俠能以力嘯召儔侶賺青錢率黃金質錦貨繡斂翠哀香各一其務者曰會首會首之家先期數月畢力經營臨期數日輸心會計及期不過往來指揮而已要之皆無賴為之亦有黃綠衣食

者會過門之家折簡召客賓徒戚屬閨秀嬰奇雲至雨集家窺則朱門錦席水覽則白舫青簾富者列筵張宴千金一揮貧者盃茶脫粟而已若夫街填巷溢壁倚肩馮店外壚旁簷間井上袂雲而汗雨者則又不可勝計也無所事事而但白袍烏帽戴花枝捧香鑪徒行會中者曰走會公卿士庶之家稚齒孩提弱齡齟齬白皙清揚之子錦帶懸髦之嬰輒令佩刀躍馬執韃持橐消赤子之心傷黃口之氣雕其樸而琢其純嗟乎可惜矣色目則有皂隸衙兵舍人掾史健兒旗手蒼頭執蓋輿夫牧豎之屬每會數百人虎邱赤壁畫小舫令壯夫舁之舟中蘇公二客及兩長年並皆孱稚歌喉清妙專諸巷有兩觀世音坐石者歛人女閒靚有艷姿魚籃觀

世音是天庫前民家子纖弱娟娟子都之姣也虎邱之麥柴亭則
雕簷曲楯疊架連楣皆以麥柴為之如黃屋琉璃光射清旭真奇
玩也祭器則南濠之瓜仁壘花石牲牢尊壺俎豆皆以瓜仁釘成
東倉之五穀壘則以稻黍之屬聚成爲樓觀軒楹楣牖動合準繩
千靈百慧窮精竭神直可供一笑耳

節錄王樞
登吳社編

弘正間長洲吳公原博寬陳公玉汝瑀吳縣王公濟之整常熟李公
世賢傑吳公禹疇洪以同郡同時同朝同道同志公暇會聚名五
同會並繪爲圖繪者爲越人丁綵

養疴
閒記

萬曆十七年大旱陽城湖涸有朱棺一具陷泥中長可三丈許破之
衣服皆灰敗髑髏巨如車輪時余讀書漁子沙上聞而訪之見有

石碑二尺許文字磨滅不可辨尙在湖底未出比再往則已毀棄

湖心矣

猶園

萬曆十八年庚寅九月初四日午後長洲縣永昌地方忽大電間有
如斗大者次俱如升田間道路之人被傷頭耳甚多垂成稻穀壓

折墮地

王象晉
羣芳譜

明洞庭山消夏灣蔣舉人某屢試春官不第遂效壟斷之術居積取
盈筭入骨髓周恤義事雖至親不拔一毛不數年稱高貴矣錢神
作祟盜劫之鞭撻炮烙慘于官刑罄其所有席捲一空盜喜過望
於是縛牲載酒卽以蔣氏之物賽願于小雷山山在太湖中絕無
民居惟荒祠一區羣盜泊舟其下悉登祭焉祭畢酣飲大醉不虞

舟師截纜以去盜醒覓舟不得徬徨無措凡賈客經過知其為盜也戒弗近駢首餓死無一存者夫義外之利意外之虞相尋於無窮豈非嗜利者之明鑒哉

李贄開然錄

文正第十三世孫從規以文正忠宣而下累世宅兆在洛者久缺封掃請于官求自往省至萬安山尹樊里省奠封掃如儀自魏公附葬諸冢遺封故存獨忠宣之兆越五里至則無所見問知為屯戍所平久矣因望祭悲號削蓁蔓披砂礫肆搜不得乃禱于空踞泣連數日天忽大雨三日夜雨止滌土去深三尺餘露斷碣數尺題曰宋丞相范忠宣公之墓大驚喜急白于守禦分圖官始按圖譜加封樹作墉屋辨址界正神道植望獸以表之勒石紀事

湧幢小品

義優者不知姓名明萬厯間在吳門演劇諸伶相謂曰聞某家有樓宿輒死今夕有能寢者當以酒勞之大淨卒然許諾已而中變小生副末亦如之大淨曰三人同往可乎衆曰諾大淨扮關公餘扮平倉從初唱大江東衆遙語之曰若爾崇不作矣遂兀坐至三更聞樓下哭甚哀哭已登樓宛然無首尸也以兩手挈其顛直前拜跪生若末心悻無措大淨獨喝曰汝何來曰冤鬼江西德安縣人羅汝俊三十六年裝米三百五十石投楓橋吳觀海售銀五百餘兩被觀海乾沒而致吾死淨曰汝之冤固也然何緣得其實曰行兇則家人吳富楊三也尸瘞梯下壓以大石三年不得伸淨曰汝誠負冤崇何也曰冀獲申理不意皆怖死非某之故淨曰汝姑息

心以待勿再呈形害人以干天紀鬼唯唯而沒淨戒二人曰事若
 洩必毀尸滅跡則負此鬼矣翌日衆勞以酒第云聞鬼聲耳無何
 大巡蒞蘇撫軍設宴范公祠大淨猝然嚙指血塗面厲聲曰本郡
 冤氣徹紫霄關某傳旨俾二公昭雪有密語不可洩二公愕然急
 屏人淨遂如鬼指盡發其隱語既仆地而暈扶出良久始甦二公
 密遣丁壯入觀海家發尸并擒二僕刑訊吐實三人俱伏辜舉郡
 稱二公如神簪雲樓雜說

翁慧生東山人喜武畧嘗客蜀聞峨嵋山僧善短槍法往師之僧初
 命入山採樵歷二年僧笑謂之曰汝採樵久良苦然身法臂法已
 寓于是乃今可教矣遂授以十八扎十二倒手諸秘法慧生心領

神解盡得其妙一時如沙家杆子馬家六合劉家帶棍號為槍中

長技者胥莫能與之敵于是翁家槍名播天下太湖備考

葉羽便洞庭山人多力好武師南昌曾天成先學飛躍無何精練天

成為致書劉號草堂亦薦其才未行而天成高弟經已覆沒羽便扼腕無

策因服賈客湘潭張氏既往收值張推故不與設計引入無人之

境四面皆幽蹊巉嶺忽大蟒張牙來約長十餘丈吐氣如霧羽便

飛揚百變已中蟒要害須臾跳擲而死及歸張大驚怖再拜服罪

邑令聞之賚銀十二兩衆復請于令建祠樹石俾居人世祝焉題

額曰姑蘇葉公生祠勒碑山上曰葉公除蟒處簪雲樓雜說

明思陵外戚周奎本吳人起家筭命以女入信邸遂徙京師迨王纘

統立周后奎封嘉定伯子姓並珥貂蟬一時稱烜赫焉崇禎十七
 年三月初十日賊信急上遣司禮監徐本正明史作徐高至奎第加侯
 爵兼諭助餉奎漫辭以應徐監泣諭再三勉捐二千兩上少之皇
 后私助五千并囑湊滿一萬奎又匿二千以三千獻十九日城破
 奎獻永定二王及宮妃于賊覲免禍賊以奎外戚蓄積必多令籍
 其家得銀五十三萬兩緞疋以車載者相屬于道猶慮諸子私殖
 令賊黨嚴拷長子都督鑑被掠死次子鉉姪銘並受夾養姪鐸體
 肥偉受刑最酷鐸本異姓子隨母再醮于周東宮立得備環衛四
 月十二日闖賊殺勳戚以奎所獻豐獨不殺仍賞錢十千五月初
 二日 大兵入都奎與鐸投誠歸旗下今其祖墓在婁門外木香

浜俗稱王墳頭豐碑巍然已作若敖之鬼矣按周鏡烈后之弟夫婦

同縊載入忠義傳鏡疑卽鑑

祁彪佳按蘇松時奸民結黨立天罡名號橫行吳中郡縣有司不能
 制彪佳廉得其魁掩捕之召紳士父老會鞠于城隍廟或曰可殺
 者卽時杖殺之民拍手稱快表禮清脩之士歸子慕朱陸宣張基
 等奉羊酒鼓吹騎從詣門謁見而疏其學行于朝請授翰林待詔
 士林傳誦爲一時盛事野志

近歲吳中洞庭山民金姓者入林屋洞深處見清水一泓中有玉大
 士像及銅龍數枚攜歸旣而大病人有分取銅龍者無不病亟還

乃已居易錄

蘇城有水仙祠頗靈異祠中有魚池石岸水亦清潔鄰人蔣氏子浴池中見金魚游泳捕之魚入石岸乃探手取之其手入石中牢不能出自辰至未百計莫解父母驚惶懇禱神前始得出其子神思昏迷如夢寐中歸而病甚未幾卒

羣芳譜

談藪謂平江大旱河水涸居人就河底掘井得沙板愈取愈多亦有

得沉香者

香祖筆記

康熙戊申三月太湖有三龍鬪一金色一青一白鬪良久二龍敗去

惟金色者游行自得時風濤大作雷雨交助遂成巨觀

曠園雜志

湯荆峴斌巡撫江蘇毀上方山五通祆廟撤土偶扑之而投諸水有人于地中得古石碣上刻肉山酒海遇湯而敗八字云仙人張三

丰書也

居易錄

康熙戊寅春治平寺僧欲建大殿延游僧恒益立關於宮巷諸鄉紳

為之護法婦人豎子拔釘書簿者日纍纍數雖足而銀未集己卯

八月初綴一小閣于木杪恒益偃息其中名曰天關飲食便溺皆

從一繩上下傾城士女往觀煽惑殊甚郡侯石文焯檄長邑侯祖

興乾擒之并住持十洲枷示限圓滿日放邑人大快

堅瓠集

治平寺有二十二房囊橐饒裕造密室藏婦女恣意淫縱柏樹房其

尤甚者也乾隆二十四年巡撫陳文恭公宏謀廉得其實令松江

府經歷盧師輔以五月初三日夜掩捕之奏聞械淫僧解京治

罪疏略云于寺內獲到婦女四人各房內搜出婦女衣飾奩具甚

多逐一讞鞫二十二房內犯姦者一十四房淫僧一十六名并供
出被奸婦女二十五人臣與布政司常壽按察司崔應階斟酌核
擬各僧平日借經懺爲漁色之媒築密室爲藏奸之窟或以計取
或以利誘或給衣食夫男有不得不從之勢婦女有不能離脫之
情常以一僧而奸佔數婦卽一婦而奸佔多年以尊長而奸污卑
幼甚至奸寡婦而騙其財產私孩而斃其命淫縱至此實與尋常
寺外奸宿者不同理宜屏諸遠方始足示懲創而肅清規此外各
房未供姦宿之僧平日通同隱庇均屬葷酒不法之徒各應勒令
還俗不許住居舊寺以滋事端奉 硃批此舉甚是但淫僧處治
尙輕裕文等六人俱着鎖拿解京八月刑部奏請杖斃奉 旨免

其杖斃着發往黑龍江賞給披甲人爲奴欽此案已定凡寺中幽
房窄狹悉撤去改爲叢林別招江寧花山寺僧住持清規始肅後
巡撫明公德置飯僧田若干畝

吳江人至府城水行者皆自間道太湖之滸是也其中又有二道大

槩由滸稍橋者

吳江境

多風順則由鮎魚口

吳縣境

直抵五龍橋爲便

于揚帆也而航船承乏其間容人衆價省故貧民往來率附之有
好安靜與迅速者或附便舟然自來無所虞今康熙之四十五六
年水旱洊飢凡附便舟往來者十二三不歸或得屍于湖濱初皆
疑溺死後乃知湖中有所謂摺鱗皮者害之也其法每舟用三人
一人搖櫓一人用繩作圈伏船頭一人佯在岸上行搖櫓者招之

卽應見客欲附便舟卽引以登與之同坐出七里港

吳江境

向湖之

西北詭云入鮎魚口客微倦同坐者卽以手入帆口引繩繫其頸

伏者在船頭緊收之同坐者復力按之客兩足跳躑旁有舟來則

搖櫓者詭怒向舟中云船小無相戲旁舟不疑旣死則盡取其財

物沉尸于湖一二年其跡不露蓋視人直如細魚所殺者以百十

計故衆以搯鯨皮名之于是有據風聞訴之縣者捕未得一日自

敗于許稍橋土人執至縣縣丞宋道昌訊得實并捕其餘黨下獄

皆瘐死自是往來者仍以湖爲坦途云

沈真崖雜錄

乾隆十年乙丑九月予家庭前早桂突發一枝高出葉上開花五朶

奇大瓣厚紋分心中復有花疊發五層纍纍如貫珠周古市先生

作重臺桂記以爲瑞應王鶴孫先生繪而爲圖不二年而家難興

其木亦遂不榮語曰天反時爲災地反物爲妖此亦花之反常者

也

吳中累歲豐稔含哺鼓腹者幾忘 帝力于何有矣乾隆十三年戊

辰春夏之交米價忽隆隆起升至十七文有市井販夫顧堯年者

倡言請平米價自縛啣刀哭籲無轅從而和者紛如聚蚊巡撫安

公寧付長洲令鄭侯時慶鞠治令縮朒不任事勢愈洶湧太守姜

公順蛟至漫曰爾等無草草我將請于上臺耳衆應曰唯復隨守

至撫轅呼號動天巡撫怒令兵弁持械驅格遂擒三十九人置獄

時四月二十四日也翌日巡撫上其事于 朝劾姜守落職以鄭

令攝府事五月二十七日 命下斃顧堯年陸文謨華龍于材曹
大混名棗陸高夏龍陳畱計二陳三吳漢公等永遠枷號餘俱杖
釋子阿大

吳中古諺云潮到夷亭出狀元乾隆丙戌潮至婁門是科狀元吳縣
張西峰書勳居楓橋己丑潮又至狀元元和陳永齋初哲居葑門
獅子口至辛卯 恩科潮直進城狀元為黃小華軒休寧籍居潘
時用巷數里之間三出大魁誠為古今希有盛事宋時閩中詩云
沖峯龜嶺與龍嶼三處山川壯矣哉相去其間只百里七年三度
狀元來視此猶為稍遜矣後辛丑長洲家相船公棨庚戌吳縣石
琢堂蘊玉癸丑吳縣潘芝軒世恩三人接踵掄元俱有瑞潮之應

乾隆二十年乙亥吳下奇荒丙子春復遭大疫大戶猶可小戶有合
門待斃者知府趙公酉設局圓妙觀招名醫二十五人更番視病
巡撫莊公有恭延穹窿道士建醮十日以蓮船送祟焚于盤門外
街坊徹夜鳴金伐鼓以祛之過夏至病乃漸減然死者已不可勝
計

三十二年夏忽傳有射弓害人見其影者立死繪圖遍傳云聞鷺聲
卽遁于是人家競參鷺鷺價頓長元和令黃公捕獲觀前畫圖者
枷責謠言始息射弓者蟲名卽蟻也含沙射人而不見其影余見
其圖形如張弓鬚如弦嘴如箭

是年七月十四日陳湖龍鬪湖水陡湧瀕湖人家俱驚惶奔竄

身門存
二
江湖拐子多浙人乘箬包頭船假醫卜雜技以游城市咒餅餌與兒童食輒迷不省遂引至舟中矐目捩肢體使之索錢街市雖父母不能識弗從命則以銅管生吸其腦髓其肉以為糗或合藥貨之治疔神效所奉神曰麻叔謀曰抽筋娘娘祠在大湖中荒山上逢令節則祀以人是人而毒于獸者前方問亭觀成宮保為御史時曾被命來蘇于滄浪亭審此案又乾隆三十五年夏破獲于吳江江浙二省會訊兩案祇斃現獲者俱未根究其黨也

乾隆四十年乙未夏秋無雨東太湖龜拆有龍骨一具橫陳湖底頭角皆備色正白鮓之粘舌與藥肆所貨者不同余曾得數塊治刀傷神效按史鑑龍墳記云龍墳在今秀水縣復禮鄉相傳禹治水至震澤斬黑

龍祭天於此

土人畊田往往得龍骨而未識也永樂間有漁者始持售于蘇州南濠藥肆中歲以為常後為左璫李黃子所知調夫往掘遂得骨角齒牙凡數十艦獻于朝時方貴龍角帶非諸王勳戚不能得一鎊直十餘金及是價為之賤蓋龍蛻骨蛇蛻皮深山大澤往往有之不足怪也又香山相近湖底有穹碑一大鐘一碑字漫漶不可讀昇置吳縣范村改為砌石鐘陷泥中重不能舉世無歐趙致金石之湮沒多矣

是年四五月間西山人家竹生實紅如枸杞及秋大旱吳縣成災按朝野僉載云開元二年終南山竹開花結子大小如麥其歲大飢宋車若水有竹米記謂淳祐元年斗米八百時竹華于山已而華

者咸實肥于麥粒炊之香美又乾道元年池州飢竹大實是竹之實其兆爲凶自古已然

五十年乙巳七月亢旱太湖水涸可履而涉近香山湖底智井甚多發磚有太康及七月等字想晉武帝時此處舊爲街市

蘇城間巷錯雜宵小易于潛藏每于冬之夜里甲雇人擊柝警夜由來已久嘉慶丙辰冬元和知縣舒侯懷忽牌諭里民親自支更一夜兩家輪值鳴鑼擊柝風雨無間如里中有失竊等事惟輪夜者是問無論官紳士庶一體當差令出譁然時爲十月二十八日卽如利四圖陶春星金機房輪值第一夜巡官至必躬親迎候否則卽被詰責以次輪筭吾家應值十一月十八夜心竊慮之至初三

日中丞費文愨公課紫陽書院舉人陳君鍾麟黃君一機吳君廷琛等合詞上訴費公覽詞喟然而詰舒以多事舒退而悻悻致書趙學師引經據典盛言諸生不應免役之故至初十日撫批行縣查明飭禁始將前牌撤去十一日照舊里甲支更間里帖然沈明經棟爲賦擊柝行紀其事云前街擊柝後街應冒雪衝風敢言病左舍擊柝右舍傳披星帶月遑息肩厥典姬公實創始掌之野廬脩閭氏用禦晨行禁夜遊立法誠良意尤美其時令出惟風行可知下順民之情三王異世不襲禮一泥古法羣疑生閭閻擊柝今誰責民辦丁糧官雇役役夫徹夜巡街坊外戶不閉民安席誰歎誤讀周官書力行新政紛紛如令嚴蠶尾治束濕民氣鬱結何由

舒昨日煌煌下一令挨戶排門夜邏遺不得倖免紳士家何況區
區爾百姓擊柝東一病者復一老翁粗布單衣不掩胛蹙蹙蹙
街當中擊柝西青衿兩兩相扶攜月黑高低路不辨一心只望荒
鷄啼擊柝南肩挑步擔人何堪晝勤衣食夜無寐明日委頓如眠
蠶擊柝北疆界分明限鄰邑鄰邑不用嚴周防未見家家喊擒賊
更有一語真駭聞賊逸而竄由不勤以賊之罪罪擊柝平民與賊
無區分苛政何須猛于虎與民齟齬民怨苦況非正本澄源方民
則病矣國何補幸爲人牧牛與羊立綱陳紀非所望若使揚揚入
政府農田水利紛更張母多言且擊柝有一不擊遭鞭扑鞭扑之
刑甚炮烙

吳縣下堡村金氏掘地得石器鑿有深窪可容一人狀類槽傍有字

僅識開元及比邱浴室等字餘俱模糊此殆槩菴大師故物也

槩菴

卽熊開元出家後住靈巖

物以人重何可忽諸從孫爲梁作長歌一首紀其事

詩云野人得石石有窪廣可容體圍周遮蠅頭疑字多磨滅槩菴
大師故物知無差大師節槩挾霜雪晚歸淨室披袈裟昨讀明史
得師傅忠言義論流滂葩精靈之物有呵護經久特出如曇華乍
看貞栗堅瑩悚毫髮再看悅入禪定無紛挐玉液久沾白蓮社善
本素植漫蘭奢倘于大定鑑止水不垢不淨難梳爬主人好奇奇
物出字附重重黃金車掇置花榭不復動愛玩成癖真莫加夜闌
須彌月甫上室中一現陀羅花遍倩名流資博識或加贊歎或咨

吳門補乘
嗟機巧都沒無異狀米顛在座應哈呀昆明劫灰問西域予也在
家如出家顧此婆婆長太息謂當淨供宜無譁軍持盃渡竟何在
物貴韜晦不貴誇矧茲貞珉世寡二稜角盡去成硯磑跳身此室
習水觀智果無瀾如恒沙他日洗鉢授弟子願欲徹底窮幽遐大
師正人出正識卽此遺器堪辟邪化人根體果長在能不遲我于
蓬崖

吳門補乘卷八

吳門補乘卷九

府志刊誤雅志

田賦

日知錄官田始末一條所置平章太尉等田

等田田字誤原文作官

物產

鯛魚吳俗常饌

按山海經樂遊之山桃水多鯛魚似蛇而四足此物豈堪入供又
按本草鮠音患魚一名草魚因其食草也江湖畜魚者以草飼之其
形長身圓肉厚而鬆狀類鯖魚有青白二種常饌疑卽此以鮠爲

鯛音之訛耳

舜歌麥

歌當作哥菽園雜記舜哥麥其穡無芒熟時遙望之焦黑若火燎云是舜後母炒熟令其播種天祐之而生故名

薄苛

荷誤作苛

公署

長洲縣署一條正德元年丞黃本正署縣事白知府況鍾改建縣署正德當作正統按況公以宣德七年守郡正統十年卒官若作正德元年則公卒已歷六十一年之久矣且本文下接弘治云云豈

有先正德而後弘治者耶縣志亦誤黃或作王

學校

長洲學以福寧廢寺地遷而新之即今所也

福寧當作萬壽按二十五卷寺觀部元和縣萬壽廢寺改為長洲學今又作福寧寺改造彼此互異又按萬壽寺崇寧中詔加崇寧尋改天寧疑以所加崇寧天寧之名遂誤作福寧耳徐顯卿文星閣記亦沿福寧之名試問名果有本昉於何代

壇廟

明孝子鄧汝甫

按人物傳作汝南本陳文莊公集此作汝甫誤元和志壇祠亦誤

刊誤
當改正

古蹟

唐陸龜蒙館娃懷古第一首

按此詩避暑錄以為皮日休作

王鏊姑蘇志載梅都官園引祝禎野錄云聖俞晚年謝事卜築滄浪

亭之旁與子美為隣雅志同

按居易錄歐陽文忠作聖俞墓誌及集序初無晚年卜居蘇州之

文其卒在京師亦未嘗謝事也小說之妄如此王文恪顧取之何

也又按盧熊志引祝禎野錄作梅摯寓居其說近是今其南梅家

橋梅姓尚多錡按盧志引野錄仍作聖俞想阮亭先生未見原書

耳

職官

隨時割記不復
詮次下並同

漢太守蕭冰本盧王
二志

按新唐書宰相世系表蕭何十一世孫冰為吳郡太守與此合又

按南齊書高祖紀冰作永與此異冰與永字形相類未知孰是

唐都督李世嘉本盧王
二志

按新唐書宰相表作李嘉

唐刺史李昌本盧王
二志

按新唐書宗室表曹王房李昌未仕

唐刺史李顥興聖皇帝之後武陽房本盧王
二志

吳門補張卷九府志職官刊誤

按新唐書宰相表顓乃姑臧房非武陽房為蘇州錄事未嘗任刺
史

唐刺史崔斌

本盧王
二志

按新唐書宰相表斌乃蘇州長史未任刺史

元總管周仁以至正九年任高履以十年任

周仁盧王
二志無

按此則周在任僅一年而鄭元祐撰周侯脩學碑記所云丙申歲
實至正十六年至十九年冬始擢江浙省郎中去鄭與周同時必
無訛但未詳初任歲月耳雅志失考又按慕志高以至元十年任
亦誤蓋至元止六年無十年也

漢太守顏駟任延

按此二人盧志別列人都尉雅志攙入太守非是

明蘇州府同知王晉陝西郡人

按陝西通志作朝邑人

宋長洲知縣虞賓山陰人累遷比部員外郎

本盧志
名宦

按餘姚縣志作餘姚人官至翰林承旨

宋長洲令石瑛石瑩中瑛列祝拱卿前瑩中列何九齡前

本王
志

按宋米友仁茂苑堂記長洲令尹石瑛瑩中又按雅志吳縣知縣
石瑛字瑩中是明明一人也今乃分名與字為二人前後矛盾長
洲志亦沿其誤

宋吳縣知縣章樵臨安人

吳門補乘

卷九

府志職官刊誤

四

按杭州志作昌化人

後漢吳令彭修

本志

修亦作循按省志辨訛彭修見後漢書獨行傳彭循見張勃吳錄其姓字爵里並同但名互異漢書云郡言州請修守吳令吳錄云太守聞循勇謀以守令謀應即請字之訛守令蓋攝令也語皆相符當是一人

明吳縣知縣樊瑾進賢人以憂去

王志未註憂去

按瑾乃南昌人南昌縣志云知吳縣改績溪亦非憂去

宋知州吳伯舉崇寧元年入為起居郎

本盧王二志

按方勺泊宅編伯舉知蘇州日謁告歸龍泉遷葬母夫人頗悔之

後竟卒於姑蘇未嘗入為起居郎也又按壁記作崇寧元年六月到

明洪武中知府自何質至姚善凡三十三人

本志

明詩綜作三十人又志何質明詩綜作何異又志黃文明詩綜作王文又志金綱之字失載明詩綜字子尚

明權攝知府王敬

姑蘇志作任敬

漢太守陳瑀建安初以安東將軍行郡事

按後漢書陳球傳瑀吳郡太守又按謝承書曰永漢元年就拜議郎遷吳郡太守不之官永漢與建安相去遠甚且不之官志誤永

漢盧志誤作光漢王志改作光和

梁太守王規中大通二年為吳郡太守

按南史本傳規任吳郡未詳年分就上文晉安王立為太子句推之則規任當在中大通三年蓋梁高祖本紀立太子乃在三年也

雅志本盧志作二年誤王志作大通中

宋齊太守張環

瓌誤作環按南史張瓌字祖逸盧志本此雅志乃沿王志之誤當改正

漢太守尹興註詳吳縣陸續傳

按續當作續

國朝府學教授吳世恒無為州人

按葑溪陸氏家譜世恒本姓陸舉人榜姓吳無為籍長洲人

齊太守江敦

按敦字誤盧王二志俱作敦

明知府李廷美以本府同知陞任

按陳曄金石新編成化丙辰陸鉞府學記貳守毛廷美此作李誤

國朝總捕同知何圖吳縣知縣何圖

按河圖字書源旗人以本府總捕同知署吳縣知縣今作何圖上一字誤又作何圖下一字亦誤且何圖何圓均與其字書源之義不合

元總管王椿

王慕一志俱無

學校門又作王椿年互異

明知府金城

未註蒞任年分列林懋舉之前按林以嘉靖二十二年任而金自

撰府學徂徠堂記乃在嘉靖二十八年則金當編林後

元總管張忙古歹至正三年任道童後至元二年任和則平後至元

四年任

按歷代編年錄後至元至正皆元惠宗年號而至正在後後至元

在前張忙古歹不當編和則平之前後校王志張以至順三年任

至順為文宗年號又在後至元之前始知前後之所以顛倒者由

至順誤作至正耳當從王志改正

明洪武中同知蕭鵬舉

名宦傳本王志

按明詩綜蕭翀字鵬舉泰和人洪武中蘇州府同知今作鵬舉是

以字為名矣

宋知州周寶

按寶盧志牧守題名作寔王志守令表同慕志作實當從盧王二

志改正

宋知州蔡密

本盧志

按密亦作鬱字子高周美成在姑蘇曾飲於衙齋見王灼碧雞漫

志

元吳縣教諭于文傳

按文傳姓于非姓于見五十一卷吳縣人物又三十六卷選舉

明長洲教諭吳司玉新舊縣志同

按郭庸重修長洲儒學碑記作可玉此作司玉誤又按碑記洪武

元年任此未註蒞任年分

明長洲教諭魏任傑新舊縣志同

按長洲縣學碑記作仕傑此作任傑誤

明長洲訓導鄺常新舊縣志同

按郭庸重修長洲儒學碑記作恒此作常誤又按碑記時為洪武

元年與教諭吳可玉訓導邊節同時志未註蒞任年分失攷

明長洲知縣宋敏文本玉志

按名宦又作文敏前後互異又按墓志及康熙中長洲志俱作文

敏

明長洲知縣郭庸未註蒞任年分列永樂五年周伯陵之後

按郭庸重修儒學記係洪武元年立石其時郭已知縣事自應編

洪武初宋文敏之前今編永樂初周伯陵之後失攷

晉吳令謝詢元康三年任

按盧志名宦傳作元康中任王志同本孫盛晉陽秋此作三年杜

誤牛若麟吳縣志作宋元嘉三年尤謬詳見後

選舉

唐張誠中第年分無考本盧志

按白居易張誠墓誌年十八以通經中第于大曆三年卒年五十

五計誠中第當在開元十八年庚午科志失考又按誠父無擇亦

登第年分無考志選舉類失載祇載誠子平叔錡按府志吳縣志唐

制科有張澤疑即無擇之誤

宋吳縣進士李益璋孫

按盧王牛三志俱作瑀孫

明崇禎壬午科舉人李楷字蓉山

按太倉志字仲木

明萬曆十年吳縣舉人馬蓋臣

具區志作沈蓋臣

明萬曆四年吳縣舉人蔣惟忠濟陽知縣

按具區志蔡惟忠字士良洞庭山人沂州知州

明嘉靖十三年吳縣舉人陸鵠其字未載高要知縣

按具區志鵠字斯立江西高安知縣

人物

後漢高岱吳郡人本吳錄

按後漢書文苑傳高彪吳郡無錫人子岱亦知名是高岱為無錫

人雅志以吳錄泛言吳郡人編入蘇州人物失考王志亦誤

隋褚輝傳徽博辯無能屈者

徽當作輝南史作輝王志作暉

唐朱佐日條武后問白日依山盡黃河入海流詩是誰作李嶠對曰
御史朱佐日詩也本王志

按此乃王之渙登鸛雀樓詩也全唐詩話及輯選唐詩諸集可考
卽紀事詩亦不載佐日名氏張景人物志引翰林盛事竟以爲佐
日作雅志遂沿其誤吳縣新志亦誤

唐沈傳師字子賢

賢字誤按唐書本傳字子言盧王二志同

明長洲顧九思條隆薦辛未進士薦當作慶朱紱條必斬一當斬當
作斬文震孟條首揆冢辛辛當作宰王佐聖條土司先經佐聖訓

諫諫當作練 國朝吳愉條授徒數十輩徒當作徒

宋徐戴王慕二志同

戴盧志作藏牛姜二志同當改正

宋朱鏞炎字明叔良五世孫引盧志

按盧志原本良作長文雅志沿王志之誤未就原本校正耳

藝術

劉宋褚嗣碁入高品

按南史羊玄保傳作褚盾王志同此作嗣誤

席謙善棋下引杜詩云席謙不見近彈碁姑蘇志雜伎

居易錄云是亦譌彈碁爲奕也何怪今人沿襲之誤又按居易錄

引西京雜記云成帝好蹴鞠羣臣以為勞體非至尊所宜劉向作
彈棊以獻又引博物志云魏文帝善彈棊能手巾角時有書生
又能低頭以所冠著葛巾角撇棊故李義山詩云玉作彈棊局中
心最不平此與奕棊有何干涉

列女

吳孫奇妻名姬配奇一年而姬亡
姬亡劉向列女傳作奇亡

明史雲翔妻黃氏

吳縣無傳長洲有傳兩見

長洲許字張應奎沈氏女

前有傳後無傳兩見

長洲章昆妻李氏

章縣志作張

長洲徐泓妻錢氏

泓縣志作泓如

國朝龔汝秩妻徐氏

長洲未旌元和已旌兩見

國朝陳兆嘉妻蔣氏

吳縣未旌元和已旌兩見

二氏

晉陸修靜郡人謚簡寂先生

引王志

按蓮社高賢傳及良常仙系記俱作吳興東遷人王志誤又按宋濂匡廬結社圖跋云或疑修靜與遠公不同時者蓋晉有兩修靜此正世稱簡寂先生者也

趙宋鄧道樞傳得上官氏廢圃於城東棲息所名會道觀

棲息所三字上脫為字

元莫起炎條宋理宗賜德書詩贊○嘗書錢壁言於門

德當作宸錢當作鐵鄒鐵壁建昌黃冠起炎師也

元步宗浩條從張雷所於元妙觀

所當作師以上三條皆王志原文之誤雅志未訂正

藝文

元詩人宋无集下又列朱名世字希賢鯨背吟

按續弘簡錄无字子虚幼冒姓朱舊以晞顏

亦作希賢

字行曹學佺十

二代詩選載朱晞顏鯨背吟即无作然則雅志分作兩人者誤也

殆未知子虚曾冒朱姓本一人耳

明王銘字秉之謚夢草集四卷

按家譜此書乃鏊之弟名銓字秉之者作非銘作也又按銘為鏊之兄字警之

趙宦光

宦光太倉人宜入藝文門流寓類

明吳信東洞庭山人

按信乃武山人

孔貞符續洞庭清氣集

貞父誤作貞符

明武山人孔聞徵

聞徵太湖備考作文徵

唐陸淳撰春秋集注春秋纂例春秋微旨春秋辨疑類禮

按新唐書藝文志五書乃陸質撰且李唐時吳中陸氏並無名淳

者

明祝允明懷星堂集

按懷星四庫書目作懷星

國朝顧藹隸辨

按隸辨乃顧藹吉著脫吉字

明朱良知化異錄

按化異具區志作紀異

明祝允明暢武集

按暢武明詩綜作暢哉當改正

明王志堅香巖詩草

崑山人長洲流寓

當作香巖室草見明詩綜

山川類明沈律鄧尉志

按沈以潛子名津字潤卿已見前有忠武錄等書此作律誤

明文肇社字聖基

聖基當作基聖

國朝顧嗣立重訂范石湖集三十五卷

按石湖集乃顧嗣協重訂此作嗣立誤嗣協字迂客號楞伽山人

嗣立之兄也又按范集吳縣金侃寫校宋板本也凡詩三十三卷

楚詞古賦一卷合三十四卷此作三十五卷誤

鄉鎮類許惟中吳郡甫里志

按輯此書者乃陳惟中字堯心元和人長洲諸生其書傳本頗多

惟中姓氏彰彰可考何竟誤作許耶

詩文類既有王穉登吳社編一卷雜著類又有王穉登吳社一卷重

出

人物傳類楊循吉吳中往哲記一卷吳中往哲記補遺四冊

按循吉祇撰正編一卷其續記一卷補遺三卷乃黃魯曾撰其書

至今行世名曰吳中往哲兩記謂君謙得之兩人同撰故云兩記

非君謙一人獨撰也當於一卷二字之下增訂云黃魯曾吳中往

哲續記一卷補遺三卷

郡縣志類楊循吉蘇州府纂修職畧

識誤作職

奏議類在環

在當作任環嘉靖時蘇松兵備道禦倭有功見名宦傳

明戴冠遂谷集

按明有兩戴冠其一字章甫長洲人正統中以貢授紹興府訓導著濯纓子集見長洲志其一字仲鵬信陽人嘉靖二年知蘇州府著遂谷集見府志職官門及明詩綜是著遂谷集者乃信陽之戴冠非長洲之戴冠也

明錢貴吳越紀餘

又見下紀載類重出

卷下第四葉明胡梅元岳草間遊草梅字白叔吳縣人又第十葉胡梅玉臺後詠清壑道人詩集

此實一人非有兩胡梅也按梅字白叔自號清壑道人吳人幼而秀穎以狐且給事徐通政申宅後為柳如是賦催妝詩錢受之擊節于是詩名籍甚受之輯入列朝詩諱之曰山人見明詩綜是白叔者梅之字清壑道人者梅之自號今前既詳其字後又及其自號其為一人也明矣況當日詩人未聞有與梅同姓名者非如王畱王銓之均有兩人也王畱一為常熟舉人一為長洲流寓穉登子見藝文王銓一為文恪弟一為文恪七世孫見人物編藝文者漫不及考既以兩戴冠併而為一又以一胡梅分而為兩紕繆殊甚

明陸金石里詩詩

下詩字誤

明吳大江媿美集註同之字與成

同之當作文之

國朝沈明掄

掄字誤當作倫

雜著唐李舟吳中聖賢冢墓記

舟字誤當作丹按職官丹蘇州刺史

災異

引後漢書五行志三事為吳王濞滅國之應文帝五年大風以下三條

按是時吳郡稱會稽所言吳乃吳國即今江都非蘇州也

唐元和三年秋浙西旱

按聞人詮本舊唐書憲紀元和三年十二月下無四年徑接四月

至十二月此必脫簡蘇州早在十一月上文冊鄧王寧為皇太子

按惠昭之立在四年十月見本傳則蘇州之旱斷是四年無疑志

蓋因舊唐書之脫簡而誤作三年也又憲紀是年蘇潤常賑米二

萬石志蠲賑類失載

明隆慶十六年十七年一條二十八年一條

按明史隆慶在位祇六年從元年乙卯推算至十六年庚午則為

萬曆十年十七年辛未則為萬曆十一年二十八年壬午則為萬

曆二十二年均非隆慶在位之年也按慕志隆慶元年下接萬曆

元年不載此兩條雅志增入失考

雜記

類異三十六葉喫肉和尚即趙頭陀

按此本異林而吳縣志分作兩人未知何本

類瓊十九葉相年有一乞兒

年當作城

吳縣志刊誤姜志

建置沿革

楊循吉建置總論漢順帝永建四年以陽羨令周嘉上書乃詔分浙江以西為吳郡治吳

按吳地記漢順帝從山陰人殷重之說立吳郡與此異

山

彈山

上既云彈山即小雞山土阜也下又云彈山橫亘六七里前後矛盾

支硎山亦名臨硎吳都賦云右號臨硎

按吳都賦左稱鸞崎右號臨碕註鸞崎臨碕閩闔名也吳後主起
昭明宮於太初之東開鸞崎臨碕之門今志以臨碕爲支碕山則
鸞崎又當何指且昭明宮在建業見金陵記與吳縣無涉又按字
書支碕之碕音刑臨碕之碕同阮字同而音異

水

既有橫金港又有橫金溪重出

物產

楮爲桌椅牀榻最佳

按爾雅釋木楮橫註腫節可爲杖前漢書孔光傳靈壽杖註木似
竹有節長不過八九尺圍三四寸自合杖製出郴州靈壽山故名

靈壽杖與今之作器者迥別又按本草別錄檉樹山中處處有之
皮似檀槐葉如欒樹爾雅謂之柜柳作箱案之屬甚佳則楮當作
檉吳中出者名杜檉紋理極堅細他處所不及

椿有香臭
二種 樗

按唐本草椿樗形相似蘇頌圖經椿葉香可啖樗氣臭故椿俗名
香椿樗俗名臭椿本二樹今云椿有香臭二種是混樗於椿而下
又別列樗失攷

蘭花笋出陽山岳園

按陽山岳園屬長洲境所產蘭花笋不當入吳縣物產

緇魚鮓

緇當作鮓鮓當作鮓音患按字書無鮓字疑卽府志之鮓然府志亦誤按府志謂常饌四時俱有按山海經樂遊之山桃水多鮓魚似蛇而四足則非吳俗常饌之魚明矣又按本草鮓似鯉卽今吳人常供者是府志誤以鮓爲鮓此又誤以鮓爲鮓

螳蟻

按韻會螳音蟻與蟻同郭璞爾雅釋蟲註蟻螳通名也姜志作兩物非

官署

佐雜官廳一條

此條在第十三葉又見第十八葉重出

市鎮

浦莊入五六都

五六都當作七都

祠廟

至德廟後梁乾化二年吳越武肅王錢元璪移置今所

按元璪乃武肅王之子廣陵王此作武肅王元璪是合父子爲一人羅泌路史元璪官蘇州節度使

寺觀

清隱菴在盤門外堰橋南宋端平間僧法厯建

此條見十一葉後十四葉又云青松菴在盤門外堰橋南舊名清

隱宋端平間僧法立創是一菴重出特以厯為立耳

永定寺梁天監中蘇州刺史顧彥先捨宅建載吳地記

按彥先名榮卒於晉元帝之六年去梁天監中遠甚且未嘗任鄉

郡

圓照菴

已見十一葉又見十四葉重出

古蹟

子胥墓櫛

按縣境無子胥墓安得有墓樹且樹櫛之說乃子胥臨終憤言並非實事

柯城鷓鴣城

按柯城即舸城今名黃埭鷓鴣即章祈並屬長洲誤入吳縣宜刪

古蹟門與第宅門重出屢見

梅福隱居蔡經宅企鴻軒范蠡宅葛洪宅周隱遙廬麴信陵宅易

老室凡八條已見古蹟又見第宅重出其中雖間有註明互見之處究嫌重出

古蹟與園林亦有重出者

辟疆園樂圃桃花塢凡三條已見古蹟又見園林亦重出

石湖別業宋范成大建園林門作別墅

按范文穆公所建乃石湖別墅至石湖別業則為前明張獻翼之

園非文穆所建也

冢墓

明進士蔣德峻墓貢士蔣維城墓

二人俱 本朝人誤入前明

明陳僖敏公鑑墓

既見十九葉又見二十八葉重出後條僅云陳僖敏公漏墓字

晉支道林塔

按高僧傳云道林還吳病甚自剗移餘姚塢中以晉太和元年閏四月四日終于所住春秋五十有三即窆于塢中厥冢存焉或云移剗未詳又高逸沙門傳云支遁終于洛陽據此則不應塔在吳中

宋晉寧侯徐爽墓明温州知府文林墓

徐墓見十五葉又見二十八葉重出且後葉誤入前明文墓見二十葉又見三十二葉重出且後葉誤入 本朝

晉石崇墓潘岳墓

廣輿記云潘岳墓在石崇墓西志本此然其說無據按崇清河人岳中牟人俱死于洛陽市何緣葬吳地又按洛陽縣志石崇墓在邙山

職官

三國吳縣丞殷禮後仕蜀為零陵太守

按是時零陵已屬吳不當云仕蜀殆因陳壽吳志禮與張溫使蜀

句誤會

宋吳縣主簿湯思退

本牛志
宦績

按宋史思退為南渡奸相不應入宦績且志本傳無績可紀止敘其歷仕官階甚覺無謂

劉宋吳令江薇道孫

薇當作徽按宋書江秉之傳秉之子徽為吳令道孫當作道曾孫明吳縣丞胡伯鯨不載里居

按伯鯨當作伯諒南昌人洪武中以人才舉任吳縣丞見南昌縣

志

本朝吳縣知縣蔡益仁以漕項卸事再任卒於官

按蕭山縣志以吳縣知縣陞寶慶府同知又按雍正六年十二月

巡撫尹繼善題參前任吳縣時贓款革職其時蔡以陳時夏荐方

任寶慶同知 上諭鑿鑿可據姜志誤

劉宋吳令謝詢元嘉三年任註漢宣帝有元康年號宋無盧王二志

俱作元康三年誤 按盧志作元康中任
未嘗作三年王志同

按孫盛晉陽秋惠帝元康中吳令謝詢云云見後八十五卷塚墓

門此又作元嘉矛盾其改盧志元康作元嘉始於牛志以為晉無

元康年號特未之考耳按統繫編晉惠帝在位十七年元康凡九

年晉何嘗無元康年號姜志又以牛志晉無二字本文改晉為宋

以自掩其誤其實何可掩也當從盧志改正

明吳縣教諭張體乾又孫忠順右屏人

乾牛志雅志俱作坤右牛志雅志俱作石當改正

選舉

明嘉靖間貢生陸洽四十七卷

按府志陸洽下陸陸洽下失名其後更有陸洽亦是嘉靖歲貢為陸洽

之弟今以失名者誤作洽是有兩陸洽矣

國朝康熙丁酉科副貢余志琦

按志琦東洞庭山人字琢山姓翁榜姓余與武山吳莊並以詩名

沈文懋公稱為東西二家

人物

龔程龔況六十卷

按中吳紀聞龔宗元晚年徙居崑山之黃姑子程孫況遂占籍玉

峯混入吳縣非是

卓行傳趙宋陸法真沈右六十卷藝苑傳明王武七十卷

按法真劉宋人見宋書良吏傳志入趙宋誤右弘簡錄輟耕錄俱

作元人姜志誤入宋雅志又誤入明武本朝人誤入明

先賢傳周言子偃五十卷名臣傳唐陸辰五十卷宋楊邦弼三十卷文苑傳

唐顧況六十卷

按子游常熟人吳縣無事跡展陝州人邦弼震澤流寓況史作姑

蘇人實為鹽官人蓋唐時鹽官猶隸蘇州雅志藝文亦沿其誤

三國陸凱元張雲金弘業明黃暉王獻臣伊伯熊伊在庭金元英文
點

此九人皆重出凱見五十一卷第一葉名臣傳又見五十五卷第
七葉忠節傳雲見六十二卷第八葉文苑傳又見六十八卷第六
葉隱逸傳弘業見六十四卷第六葉武畧傳又見七十一卷第四
葉游俠傳暉見五十三卷二十一葉名臣傳又見六十七卷第六
葉卓行傳獻臣見五十四卷第五葉名臣傳又見六十七卷第五
葉卓行傳伯熊見五十八卷第四葉循良傳又見六十七卷第七
葉卓行傳且前作伯熊後又誤作伯龍其實一人也在庭事實附
見五十四卷第九葉父敏生傳又六十七卷第七葉自有傳元英

見六十七卷十八葉卓行傳又見七十卷第九葉好義傳且前既
入明代後又入 本朝互異點六十二卷二十五葉自有傳又附
見六十八卷十二葉揆傳○凡分類太多最易重出姜志人物傳
之所以前後重出者徒以門目繁多耳史家列傳後更分儒林文
翰忠義權倖等傳體例綦嚴若郡縣志祇于人物傳後分列孝義
一門雅志則統於人物不復分列更爲簡括今此書自先賢至游
俠凡分十三門以致錯出紛紜前後重複此體例之不可不慎也
游寓藝苑方術
不在十三門中○王士禎居易錄云山東通志修於康熙癸丑當
事既視爲具文秉筆者又鹵莽滅裂不諳掌故人物其時吳郡顧
炎武在局而不一是正潦草成書甚可惜也吾於此書亦云然

摘南史朱异本傳前段載入文苑六十卷

按南史本傳及梁宋昇傳俱以昇為吳郡錢唐人非吳縣人殆為

三國時朱異所混耳

名臣晉顧和傳和子球五十卷

按晉書本傳和子並無名球者球乃和之宗人也本傳云宗人球

亦有令聞志失考又志所引乃本宋顧覲之家傳非晉書和傳本

文原註晉書誤

名臣齊陸慧曉傳字淑明○府參軍劉璉○吏曹郎令史五十卷

叔誤作淑璉誤作璉都誤作郎宜從盧志改正

名臣陳陸繕傳拜御中丞○子名慧辨字敬臣五十卷

御字下漏史字慧辨當作辯慧敬臣當作敬仁宜從南史改正

名臣宋鄭戩傳祖延紹五十卷

姜志本王志作紹當從宋史改作祐

忠節宋滕禔傳二子彪彰俱陷軍中禔弟綺五十卷

彪誤作彰虜誤作軍禔誤作綺彰音編彰音彬禔音綺

循良傳梁陸通五十卷

按北史通與逞俱仕魏周其曾祖載自宋初沒入赫連氏則通不

得列吳中人物逞同逞見五十一卷

能吏宋張永傳為廣陵南郡二郡太守五十卷

南郡南史作南沛當改正

吳門補張卷九 吳縣志人物刊誤

儒林漢臯弘傳代為寇族○事博士九江朱晉○拜議郎使太子尚

書 六十卷

寇雅志作冠王志作宦晉雅志作普使字下漏授字

文苑梁陸煦傳煦果弟 六十卷

杲誤作果

隋潘徽傳秦孝王俊召為博士嘗從俊朝京○煬帝時為晉揚○楊

玄感敗凡所交聞多罹其害 六十卷

博士隋書作學士京隋書作京師晉揚隋書作晉王交聞隋書作

交關

唐陸希聲傳景榮四世孫 六十卷

榮王志本唐書作融

文苑傳宋劉逸少 六十卷

逸少王志雅志俱作少逸

宋許洞傳祀汾陽獻三盛禮 六十卷

陽王志作陰禮字下王志有賦字王志本宋史當從之

宋沈括本錢唐人兄邁徙蘇州括登嘉靖八年進士 六十卷

此條沿龔牛志所引杜啓人物傳未及詳考沈氏世繫按臨川集

括之父周周之弟同同子扶扶子邁則邁乃括之兄子又按括夢

溪筆談云羣從文通文通者邁字也而係以羣從其為兄子無疑

此作兄誤又云兄子遼則知邁與遼皆非括之兄又括為錢唐人

當從雅志入流寓又嘉祐誤作嘉靖

宋龔程宗元子 六十卷

按中吳紀聞及吳郡志程祖識自邵武徙吳後又徙崑山之黃姑父宗元生於吳縣後亦隨識徙崑山至程則占籍崑山不當混入

吳縣

宋李璋傳王安石有詩送璋應舉云湖海青衣二十年尚逋鄉賦已

華顛 六十卷

此條見中吳紀聞青衣當作聲名道當作隨

本朝楊无咎傳凡陰陽配偶之卦連曰皆相對 六十卷

連山誤作連曰

明黃魯曾傳暉子黃省曾傳注申鑿行世 六十卷

暉子當作暉孫按宗譜暉生異異生魯曾省曾鑿誤作鑿申鑿書名

明徐令傳魏莊恭簡校 六十卷

按明史魏校傳諡恭簡號莊渠此云魏莊漏渠字

孝友宋張敷傳世父湛 六十卷

按宋書及南史敷世父乃茂度也此作湛誤下湛曰湛字同姜志

引王志未及細校耳

元金道玄傳挈奴遁去後以子問累贈至侍讀學士 六十卷

挈誤作奴問字下脫貴字當從續吳先賢讚改正

明顏秀傳字季粟六十卷

此條引劉鳳續吳先賢讚琇誤作秀粟誤作粟

卓行宋陳瀧傳海清澗幽○陳永字久所六十卷

按宋顧逢號梅山樵叟陳瀧號碧澗翁皆能詩故有梅清澗幽之

評梅此作海誤久所當作子久

明嚴德珉傳延教授李綺與德珉以席六十卷

與當作飲以當作與

伊浦傳父悌六十卷

按溥乃恒之子悌之姪此作父悌誤

隱逸傳齊何求弟點盾六十卷

按南史求本瀟人來隱武邱當入流寓點盾亦然

元金可久字素公六十卷

久當從慕志作文蓋其名可文方與字素公之義相符

明都印六十卷

印當作印

國朝徐枋文靖公沂子六十卷

按枋父名沂此作沂誤

明陳植六十卷

按盧志植為深之子深生於宋末而歿於元初則其子當為元人

又按四庫書目作元人姜志編入明末楊端孝先生之下失考

隱逸傳明徐廷相○有袖莊稿六十卷

按此條見具區志廷相作廷柏袖作袖

明顧璘五十卷又璘弟璫五十卷

按明詩綜璘先世本吳縣人後徙南京不言自璘徙也璫上元人又按明史二人本傳亦作上元人不言先世原籍然則兩人不應入吳縣

隱逸傳漢角里先生周術六十卷

按史記索隱以為河內軹人志當載流寓不當入人物又按陳雷志稱術為秦伯之後

藝術

明吳甘泉失其名

按甘泉名琬湖州人精於易世居呂山載湖州志及湧幢小品其誤入吳縣志者蓋因吳縣長興俱有呂山耳伍餘福莘野纂聞以為長洲呂山人按長洲並無呂山疑長興之誤

流寓

漢梅福人有見之會稽者變姓名為吳門市卒六十九卷

按分甘餘話亦引漢書此條或云吳門乃洪州今有鎮名吳門然總非蘇州也

唐張祐

祐誤作祐

吳門補乘 卷九

吳縣志藝術流寓列女刊誤

完

國朝楊賓父安城仲弟寶

安城府志作春華實府志作寶

國朝姜採姜垓

按二姜先生見明史不當入本朝

列女

女秀李氏詩桃花一簇開無主終不畱題崔護家

本張景人物志

按此詩載鄭氏貞懿集中景失考

七十二卷十七葉第一行至第四行

以下俱七十三卷

此四行已見前十八葉之末重出

十七葉李氏邱氏以雍正元旌

此記旌年也元字下脫年字

十七葉顧氏湯自申妻十八葉樊氏施天佑未婚妾

顧氏傳見十八葉此宜削樊為未婚妻誤作妾

二十葉第一行聞者莫不嘉歎

此六字衍文

二十葉陸氏揚山農人女○二十一葉第一行題旌

陽誤作揚題旌二字衍文

二十一葉周氏吳肇遠妻程氏貝啓祚妻

周氏傳即見此葉程氏傳亦見後微顯志此二人皆重出程氏旌

年當注微顯志本傳之末下鄒氏諸人同

二十二葉鄒氏汪學舒妻

微顯志有傳此重出

二十二葉諸葛氏許文韜未婚妻

傳即見前重出前云乾隆三年旌此又作四年互異

二十三葉虞氏卞王臣妻吳氏陳又龍妻

虞氏微顯志有傳此重出吳氏傳即見後此亦重出

七十四卷第一葉堵氏吳縣馬蹟山人

以下二條並七十四卷

按馬蹟山屬常州府陽湖縣非吳縣境堵氏不宜混入

第五葉金氏蔣二樓祖母張氏二樓母

按太湖備考二樓祖母乃屠氏非金氏也母乃季氏非張氏也

二氏

漢魏伯陽

按神仙傳伯陽上虞人志誤入

三國董奉

按神仙傳奉侯官人羣仙錄以為吳人者蓋吳時人非吳地人也

志誤采

藝文

張公洞善權洞詩

九十五卷十五葉十六葉

此屬宜與非吳縣境

祥異

吳門補遺

卷九

吳縣志二氏藝文祥異刊誤

三

吳會稽王太平元年八月大風吳高陵松柏斯拔

按高陵乃孫堅墓陳壽以為在曲阿即今丹陽非吳縣境盧熊謂始葬曲阿後遷於吳此臆說也又按雅志祥異門亦載此事作晉

太元元年

永安二年吳景帝年號熒惑化為小兒

此乃吳都事時已遷建業亦與吳縣無涉

天璽元年吳烏程侯年號臨平湖開

按湖在仁和縣亦非吳縣事

晉咸和七年顯宗年號

按咸和當作咸康見宋書五行志

唐天復三年昭宗年號雪膏牛志

按吳越備史作晉天福二年志失考

前明編年多漏字

英宗正統十四年下徑接五年甲戌一條脫景泰二字景泰五年

下徑接四年戊子一條脫憲宗成化四字按此四字當從下十年條移入四年條

化十四年下徑接二年己酉一條脫孝宗弘治四字此四字宜從下五年條移

入二年條

嘉靖中妖人剪紙為狐

按馮猶龍智囊譜作隆慶中

太宗太平興國三年

此言宋太宗也上文皆紀唐代事此條太宗上不加宋字以別之則亦混入於唐矣

越王殺文種一條

此係越事與吳縣無涉

國朝康熙五十二年虎入王氏日涉園

按王氏園名歸田未嘗名日涉且屬元和境

兵防

雍正二年添設太湖營參將駐劄東洞庭山又太湖同知一員兼理客債及社壇踰匠諸務

是將太湖營與社壇營攙雜又字以下十八字宜削

雜記

洞庭山浮于水上一條九十一卷第一葉

按此本王子年拾遺記指洞庭湖中之君山非指吳縣洞庭山也

事物紺珠武昌君山亦名洞庭山非明徵耶姜志沿舊志之誤

皇祐二年浙西大饑范文正公縱競渡修佛寺一條九十一卷十六葉

按此乃公守杭州事與蘇州無涉蓋公以景祐元年知蘇州其知

杭州正在皇祐初也又按通鑑綱目淮浙飢乃在皇祐三年亦非

二年事

苻堅三年蒼蠅洩赦文一條九十一卷八葉

按此乃苻堅事見十六國春秋及續搜神記苻堅以臨渭氏僭號

大秦都長安去吳遠甚志殆以苻堅為孫堅耳

孫權步夫人一條吳主趙夫人以下七條九十一卷第四葉至第六葉

時吳已遷都秣陵及武昌此八條俱非吳縣事

孫堅墜馬一條九十一卷第七葉

亦非吳縣事

闔閭墓一條九十一卷第二葉

按墓在虎邱屬長洲境今分隸元和誤入吳縣

吳邊邑處女爭桑一條九十卷第一葉

既云邊邑則非吳縣事誤入

小序稱舊志季子掛劍已詳本傳雜記重出無謂九十一卷第一葉

按姜志仍沿舊志之弊駁人適以自駁耳

吳王夫差坐殿上獨見四人一條九十卷第二葉

已見祥異類第三葉王勝齊條重出

吳王夫差將死以帛幘目一條同上

已見祥異類第四葉二十三年條重出○雜記記事之無可附者

既有所附何須復贅并不若他部之猶可互見也

唐陸龜蒙九十一卷第八葉周生夢鵝一條十八葉

按龜蒙元和人周生崑山尉俱攔入吳縣非

吳既滅越一條九十一卷第二葉顧況一條第七葉

吳滅越越王築臺乃越事況浙之鹽官人亦與吳縣無涉

唐范童子至明周治凡三十條俱應編入人物九十卷五葉至十四葉

宋李育一條九十卷第五葉明吳燿一條八葉

已見六十二卷人物俱重出

[Faint bleed-through text from the reverse side of the page]

長洲縣志刊誤李志

園亭

明瞿逢祥園溪魚樂在沙頭鎮

園當作團逢祥元人非明人沙頭鎮屬太倉不屬長洲見采風類

記府志作團溪樂隱入常熟

職官

明知縣鄺璠主簿喻秉

按鄺為吳令見吳志又按吳寬沙湖堤記云知縣劉珂鄺璠縣丞
寶肩主簿喻秉長洲志據此遂將鄺喻三人入職官不知沙湖之
役乃兩縣合辦若以鄺為長洲令則與劉珂為同時一邑兩令矣

秉亦見吳志任吳丞疑以簿升丞者

學宮傍名宦祠中有唐長洲令蕭審

按審極貪暴不應入祀典

明教諭黃文偉偉當從府志作煒訓導能永昌字以鞞按康熙字典

無鞞字當從府志作諤訓導范滂滂當從府志作嶢嶢見崇禎五

年陳文莊公重修儒學記

宋知縣唐程

程當從府志作程

人物

五代科目吳仁璧字廷實天順二年進士

按海虞錢氏譜仁璧關中人當入流寓又按盧志字廷實此作廷

實誤前第十九卷科目又作廷貴矛盾又大順為唐昭宗年號天

順則為明英宗年號大順誤作天順

宋方惟深傳與先長文同為鄉人所重宋人有後

先長文先字當作朱朱人朱字當作先

明劉溥祖彥敬父士賓

按彥敬明史文苑本傳作彥士賓續先賢讚作觀彥敬士賓皆字

也

王懋明

既見二十二卷又見二十三卷重出

國朝張大受

國朝別裁集作嘉定人

明顧存仁

明史作太倉人

明王觀賓曾孫

按府志王賓傳賓平生不娶焉得有曾孫

明孔鏞字文韶

文韶十九卷科目及府志人物俱作韶文

明文徵明孫震孟

按雁門家乘徵明生彭彭生元發元發生震孟是震孟乃徵明曾

孫非孫也

元和縣志刊誤許志

寺觀

定慧寺嘯軒僧定欽為東坡構藝文有東坡定慧院嘯軒詩

按黃岡縣志云定慧院在清淮門外蘇軾以元豐三年二月到黃

寓居於此公有遊定慧院記又有定慧院東海棠詩一首石刻藏黃邑王

氏有東坡自繪像定慧院寓居月夜偶出二首定慧院願師為子竹下開

嘯軒一首皆為黃州詠也次韻定慧欽長老見寄八首為蘇州詠

也總之蘇黃二州皆有定慧院皆為坡公遊寓之所而嘯軒則屬

黃之定慧不屬蘇州許志誤

冢墓

周澹臺子羽墓在澹臺湖傍

按水經注引京相璠曰今泰山南武城縣有澹臺子羽冢縣人也
又陳畱裘氏鄉有子羽冢又豫章圖經總持寺之東有澹臺子羽
墓杜光庭錄異記以為在城東南角三十一步鍾傅修城掘磚見
之因立亭其上以表古蹟是澹臺墓凡四見京說為長

列女

呂氏張鳳鳴聘室二十八卷徐氏陳佩玉妻佩玉即前樹琳字○六十三葉顧氏董

本素妻金氏顧璐妻六十葉陸氏丁殿鵬妻李氏吳明山妻陸氏王助

妻錢氏蔣維垣妻六十卷黃氏陸禧妻滕氏王景登妻王氏李慶生妻

七十葉滕氏蘇綸繼妻章氏周彩若妻許氏文軌妻姜氏程廩年繼妻

七十葉張氏朱君順妻七十四葉朱長洲志作諸

以上十六人止載姓氏皆就 旌表年分編次然諸人自有傳此

皆贅列削之為是祇當註旌年於本傳之末耳呂氏傳見七十八

葉本傳已註旌年徐氏傳見六十一葉雍正十年旌顧氏附見五十五葉湯氏

傳雍正十年旌金氏附見五十六葉徐氏傳旌年前陸氏傳見五十七

葉府志乾隆三年旌李氏傳見二十三葉後陸氏傳見四十五葉旌年錢

氏傳見三十一葉旌年黃氏傳見二十六葉乾隆五年旌前滕氏傳見

四十八葉旌年王氏傳見四十二葉旌年後滕氏傳見四十七葉

乾隆六年旌章氏傳見五十九葉旌年許氏傳見六十二葉旌年姜氏

傳見四十八葉旌年張氏附見三十二葉朱貞女傳乾隆十年旌○按

府志體例節婦有傳者列於前其無傳者但分已旌未旌彙編於

後故無重出之患長洲志亦然元和志亦當從其例

顧氏監生宋沅妻未旌

二十八卷
六十七葉

傳已見六十葉重出

邵氏婁德培妻

六十葉
潘氏施琬妻
七十
五葉

此兩人皆無傳而兩見尤覺重複無謂邵氏前入未旌後七十葉

又入已旌當存後去前潘已見七十四葉此宜削

六十八葉第八行以下諸人乾隆四年旌

雅志乾隆三年旌者此皆混入四年四年旌者此皆失載紕繆殊


甚

六十四葉張氏葉長升妻

褚氏誤作張氏葉居婁門為余比鄰故知其誤

吳門補乘

吳門補乘卷九



天保辛卯

